

DER TÒNZ

Der gaiger vònk u' za druken as de batu'

Ont a lustegas kansandl vare kloa' reta aribart en gònze sol.

De lait lònng sai' za tschatscherarn ont der sai'blick geat en tònzgrup.

Der tònzar, leikt se glaim en de sai' tonzaren

Sai'na hent vinn en se propre schea' geknopft.

De ònder hònt hòltat de tonzaren abia a hoakleges glos.

De hèlln, glenzena ang va de sai' tonzaren sai' abia an plitz,

ober der tonzar verggest koa' tritt.

Der tònzar hòt a vrischa, spilhu' veder as vònzta harau van huat

A saidegans tunklegas pfruspflèck

Ont a baisas, sche' schoprescharats hemat unten versteckt.

As en hemet glenzt a vòrbegas pet ackerle gamòchats pintl.

As de erbel a bollens himbling as schitzt s baises hemat.

De vias van tonzarn sai'abia de viscchler van meir,

riarn se òlbe zòmm ober tea'n se nia stoasn.

De riarn se drinn en sol zòmm pet e òndern tònzer,

junga ont eltrera kearn òlla glaich

ont dra'n abia schea'na vòrbega plea'mbler.

De tonzaren as de ònder sait hòt der sai' bai'vorbe, lònng, vaiertagabònt,

pet a runde sicht man de baisn, pa'mbolla, krotzeta housn.

An ackarle hòls tiachl as vill òrbet hòt kostet

Pet laoter plea'mbler drukt de tònzaren au.

A lònnges hellas virta ist eng as de hufftn gepuntet

an studiaretn ont tschain knopf as de tschenket sait,

za lònng verstea' as de tònzaren nèt gahairetet ist.

A schea'na zopf abia an burm zòmm garidl asn kopf,

A por òrma klavn ont geltena retschin glenzn as en sai' gschicht.

De sonada geat baiter,
De schua schlong, schlipfen ont hupfn as en hòlzenen pourn.
De hent klòtschn, schbitzen, drucken, knopfn se zòmm.
Glaim en gaiger sitzen a por eltrera baiber,
Òlla pet tunklega , glaich gevlickelta gabanter.
De baiber tea' òlla pet sai'na gevitzeta hent òrbetn:
spinnen de boll, mòchen housn, mòchn ackerle ont vlicken,
òlla runt gahasse, sicher ont konzentriart as de sai' òrbet.
An mònn asn a sait schnitzlt de kospn,
Lòcht unter sai'na lònnga ont ritschleta schnai'z.
De tònzer vòng en ù za singen òlla zòmm,
A bersntolerisches liad, ver òlla pakònnnt.
Òlla vroa, lòchet, luste, a toal bisspln,
de tonzer sai' runt stolz za tònzen
ont za trong enìvire sai'na praich ont tenz.
Der tonz ist veite, òlla de tònzar schaug se u'
a toal mia, a toal minder, ober sechen nea'mer de stunn
Za gea'baiter pet an òndern tònz.